

# **Folktales and Riddles in the Mowar Dialect of Kanuri**

## **1974 Gashagar, Nigeria**

Introduction,. These folktales and riddles come from the town of Gashagar in Borno State, Nigeria where they were recorded by John Hutchison and Norbert Cyffer, during a research trip as Research Fellows at the Center for the Study of Nigerian Languages of Bayero University Kano. The purpose of the trip was to gather Kanuri language materials in a variety of the dialects of the Kanuri language. Gashagar is a town inhabited by the Mowar sub-group of the Kanuri people and the texts shown here represent the Mobar or Mowar dialect of Kanuri.

# **SURONZE**

## **KƏLA**

## **SHAFI**

### **TITTIMI I**

❖ Modu Kəla Baa.....	3
❖ Ngəri Zoli.....	3
❖ Bultu-a Kamunjə-a .....	4
❖ Kəmurso-a Diwonjə-a .....	5
❖ Fero-a Kakanjə-a .....	6
❖ Kəmurso Kəria .....	7

### **CA NYIGAA**

❖ Kam Yakə .....	8
❖ Shim Yakə .....	9

### **TITTIMI (Kori)**

❖ Tittimi wo? Kude! .....	11
---------------------------	----

### **TITTIMI II**

❖ Matabidido-a Kamuwanjə-a .....	13
❖ Fero Mayawaa .....	14
❖ Modu Ngani.....	15

## **TITTIMI I**

### **Modu Kəla Baa**

Ngo wo Modu kəla baa leyi kulo gowono. Kulo kodoo celli, celli fiyi nadoro kedonna, yalla laa shiro banadaro kasu. Banaya daano. Wolta kuru sa nadobe cidinna isa banayada, kuru barebe cidonnya isa banaya bareyada, kuru sa kamdabe cido, shi kolli kasuwuro leyo. Kamunjəro wande kuloro lenəmmi, lenəmmi cindo, leyu kangəle gərəkkin cə, kangəle parallona, wundu wonna? Wuma kamu modu kəla babe cə gullono. Yallaso leno banagəno ca, leya kangəle kulobe ngaa namnjada wono. Modu kəla ba kasuwun isə kamunjəro are leye kuloro cə, dane fadakui laa denge duwo cə gullinno. Are leye kuloro ca, dane fadakui laa denge cə gullinno. Adə yeyin duwo leyedannya argəm ngaa cidin fiyada. Kamunjəro fok cənna. Adə wundu? Wuma Modu kəla ba kamunyi yeyikin cə gullono wono yallaso leyeno banagənno canno, yallaso dəp, dəp dəp kamunjə casanə kəla kaliyyen royada. Shi ye cigə yeyikin cə pak kannya, adə ndu? Wuma Modu kəla ba cigə yeyikin cə gullono wono. Leyeno cigənjədə yevo banagənno canno. Duk casanə dagano. Shi ye kəla kaliyyen royada.

\*\*\*\*\*

## **Ngəri Zoli**

Ngo wono kənyeri-a ngəri-a bikkeyando kənaye cadannya are leye yande ladiye. Nyi ngalo ngalləmiya, wu nawu ngalləkennyä yo cə. Kənyeri yanjə kullin gərayi, shi leyi yanjə ciladə ngalo ngalli jiyironnya, bikkeyando kənaye cidannya yanjə cuwudu cimbindo cam gana she nja dapcin duwo ya kənyeribe nuno, ya ngəriye madaro ciyano leyaindo, leyaindo ngəri yindi coru:

Yeya ngəriso yeya ngəriso yanyi ruwiya  
Yanəm cisəro cisə wi?  
Yanyi bel bel belleram karimo maindeye yeyi gudungurya  
Fər maindebe yeyi kəmagən yeyi  
Fero kaawibe Yerima Buwor Busammibe ruyondo wa?  
Kone cingo bedo bullan cain.

Ngai duwo leyi cingo bedo bullan ciwandə dayi cindum. Bikkenjə yegeno. Are dawu adəlan yanəm mbeyi wa gone ca leyi yanjə wuyi goyi təgain cine buriwua mbot mbot cimbindono buriwudə cidiro curunno kuriye gongi ciya cidiro tərnayin.

\*\*\*\*\*

## **Bultu-a Kamunjə-a**

Bultu-a katti dongur fal-a, koro-a kalimo-a dal bəlan-a sandi yakkə leyaindo, awi yeyin nandi ngaa nji ishiya fadoro lenəwi cə gullo wono. Kattiye karwa sawu ishiya lengin cə gullono wono. Koroye ong ong gulləkiya lengin. Kalimoye bule yikkəkiya lengin cə gullono. Katti ye nji kadionna yiyno – koro ye leyeno. Kalimo ye leyeno, seyi ngai leyanna dal kəla ngotkənnero tatkan – meye meye ca na caye. Jəpcu gallawu goyin goyin goyin ngai duwo leyi bəlaa Bultubero karawo. Bultu shi-a kamunjə-a napkada, bultu diandi goyi:  
Ku bəri kənjinia jiwe.

Kənjini dalwea jiwe

Dal bəlannea jiwe cin

Kullum kullum ngai cin duwo, kawu fal jana galyai curo shi-a kamunjə-a jawa daltəye curunadə bali shidə ca duwayain canna. Fanna cinnadə cidacidama culuyinbaro njekkəne cə bushi lapcu batti batti tərəgəm lapcu katti juyi. Ngai jana gonge duwangi njinna dale kangadilan bakkanonya cidiro kule yezi curo bəlaanjəyen curonnya cidiro tutuyina. Fanna cinnadə kane! Banjə Modube cinnadə njakkəgəne madə, ngo ral ral ralro cə gullinno- ngai cinndo bullu bakcə culuwunya njidinjədəno wuri tuyu wollorommin rupcinadə. Kadinna ndu wuri adəyea wuyu wona? Yallaso cowodə wande kollyanya cə cutuwunya dal bussa awo bakkannya kariyi fiyeno- kariyi fiyi leyenonya, kuru kamudəye curo njeyero cikkə kollinado, njedə gəyinado tadañə kuk! Kuk! Kuk! Cinnadə awi curo adəlan dəga nji gullono? Yanyi awo laaye curo adəlan bangsin nji gullono wono- bərinəm cə gullono. Cimowona aa dəye cə gullono- kwadə nandi kamuso yalso bərindoa dadəndo-a cə gullono- cimowona dalle culuwu bakkannya njedə kolli karaaro mərit karawo. Tiara tarira karawu səmo yindiayen burtutuwu luwu luwu yani kuri sheyen awi kurido dimin. Tadanyiro yikkin. Ndu tadanəm cunjə. Modube mamaduye, modu sənyi femabe, femaye kanyimaye manyi adə fano. Ande fane waye, waye waraye. Makkaro lenyenne. Makkalan awi dəga? Makkalan Goni dəga. Goni kam ndawu cambo? kəlimi jarami cambo. Laccinnda. illalawu bəri ngawuribe jeni namjo. Kəmis.

\*\*\*\*\*

### **Kəmurso-a Diwonjə-a**

Ngo wono kəmurso laa-a diwonjə-a ciya diwinoro leyada. Diwinoro leyadannya, diwinoro cottoru cottoru koronjaso ngaa cidə, kuwa kamdəye cino diwoldə wune kəskadə kam laa mbeyiga bowone are. Yo cə ciyu kəskaro taticna kam ngada tulurman akan. Ayya kam akaye towodə, to kakanyiye bowonjn. Wu

ngallema Maimaye bowosənnyi. Mai əni Malamaye bowosin. Ku kakanəmye bowosin, lengema curəsko. Sussuru surut cinnaro ngada fallin. Ngai duwo ngada tulurso ca. Nanjaro keto. Koronja lapciwo. Ndaso kakke wo ca, dəmbabedə gone cain. A'a gana cin. Ndaso kakke wo ca? korobedə gone cain. A'a gana cin. Ngai duwo karenjə duk cino leyeno.

\*\*\*\*\*

### **Fero-a Kakanjə-a**

Ngo wono fero ciyi səniro leyewono. Səniro leyenonya diwiro kime cit curonya leyi kakanjəso bowoyu koroso dəmba laaso badi laaso capca cowodu cuttoru wono. Nda tanne kəri adəlan kam laa mbeyiga bowone isə cə gullono.

Tatkanonya ngudo ci ye kimea dəwuri ye kimea ənia ba cə gullono. Lene shidə yaye bowono isə cə gullono wono. Ngudo ci ye kimea dəwuri ye kimea are kakanyiye bowonjin. Wu Maimaye bowosəni, Mai Malamaye bowosəni ku kakanəmbe bowoskono. Lengema curuko. Sussuru suruwu cə gullono wono ngada fal ca wono. Ngai duwo ngada uwuso ca.

Dayi awi nuwanyi wo? Koroyedə

awi nuwanyi wo? Dəmbayedə

awi nuwanyi wo? Caliyedə

awi nuwanyi wo? Wu kəlanyi

awi nuwanyi wo? Kakanyi

Adə yeyi duwo duk cundu tamoyo. Koro kakaye tilo kollono. Leya koro kakayero namme kəngəsənyi yeyeno. Ceyin ceyin ceyiason diwino tiyin, ceyiaso diwino tiyin duwo, shi yillaan leyu fanjaro darimin tulok cukkuruwonya ngo wono kamu wono kwa tanni. Kərinjə tulur wono. Napcina bullu wono kllum fanjəro kundisiro ishocco. Ishin ishindo cine sortəgəne cə gullono wono. Cortəgəna leyindo, wolləkin nja, batti nando bəri colloram, wolləkinnja batti

nando këska dororam cin. Adə kairo bëlaanjëro cado wono. Bëlaanjën këskér curo ciyenna bullu wono.

Shilla din luye bëlin gayin shilla din luye bëlin gayi ngai cin duwo shi iso. Kérini yo yo kérini yo. Katurshi yowa kawuleye kérma lejinganga yo kérini yo. Kérinjë faldë kamji daano wono. Gade laminno cido kérinjë yindi kamji daano. Ngai duwo kériyanjë seyi tulurso kamja dayada. Gallawu goya isa cirga karawu laaben dayeda. Samma këla kakke shi kakke jegedu dayeda.

\*\*\*\*\*

### **Kémurso Kéria**

Kémurso dawu yallanjëyen kérinjëa napcina duwo badi wu adə gosəno sado karaa dawu dərin kolsəno wono. Casadə njim garca kefa təmja kolyadanya, dayi napcana angallin konnu fuyana bérinja deya waciya rəpcaindo kawu fallo kalləm kuruwu isə curu wundu dərinilan konnu fuyi, dərini semilan konnu fuyi, semini saramilan konnu fuyi batari shiwarammilan konnu fuyi. Kaweni ware waleraimlan konnu fuyi. Cellemmi wuma carinəmmo, wuma kawenəm ware walerammin konnu fungo. Wayiyaso wolli ishin. Bikke kəyi kérənnəkinba cə kéri ceyi gərci cadə kollonya. Dayi kéri warcə budu kəndeyiro capci gənano. Dayə wollin ngai duwu cadə ngadaro kollino səl goyi leyenonya, isə dayi bikkenjë yegeno. Shal, cirga kefayen yegeno shal, curo njimben yegeno shal. Ngai duwo nduma baro asuwono. Kémurso dushi diyellero kollada loloyin ngai duwo, goyi cuwudu cidiro lərətcin, cidiro lərətcin goyina leyindo yalnjəssoye coru camowonya, anəm cayedo njadenda bəlaro kalanjen yeda. Bəlaro sadowo wono.

\*\*\*\*\*

## **CA NYIGAA**

### **Kam Yakə**

1. Kam fal ciyi mataro karaaro suluwo, leyi karaan majin, majin, majin duwo leyi bəla fallan bowono. Bəladə wos wajia kam yakə zagarin. Waganya kam yakədən shi fal əniya sowondənni kəla shi fal adə layiyewu gərewu. A'a leyewu gade manewu. Kambiwutain ngai duwo kolya gade mataro leyeda. Gade mayain mayain, mayainson gade sowondənni. Wolla kasu shi ye ciyi cagasəna, shi adə jagain jagain, jagain duwo leza furtu kəska laaben bozada. Shi ye kəla kəskadəben simbare zəwa napsina letcain duwo fayana, kəska adəga cellewu yadewu bəri Maindebe denewu. Yo de letədəroa cellewu. Shi ye kəla kəskaben napkada. Kəska adəga cellayain, cellayain, cellayain duwo hawa fal wolwono. Hawa fal ye cidi bewu ye səlkatə. Bewu goya jayada. Kuru səlkatə. Bewu naptəro waji. kollewu lenewu kəska adəmaye bəri Maindebe cidin baiya, lenewu. Kambiwutain. Laaye kəska fal adə kollen ba. Yeya Modu niye kambiwunəm. Care kamdə gərewu gənnya kambiwu dəmmo kolle kamdə cigaso. Kambiwunəmba ni-a celliniya ni are. Yo jama mewuyema Alawe shi kolli jəga.

Jama kam adə jaraptəna wa?

2. Kamu fal fado kwanjəwelan curo goyi kəndawu ləgar kamu ləgar aro karga kənəssə mewua yim wajia sambinna shi-a kwanjə-a zagado. Ciyi gərazə fado yanzəbero lengin cə bune suluwo lenjindo dawu karaabelan shiga suroye leyeno. Nadəlan cambo. Shi kamudə kəmandeye mayino nadən konu. Bozəna wazənalan kamu adə kowusoye gərtakia gərtakia zawo. Kəmandeye tada tiweldə fəraminjəma kowuye lezəni.

Jama tada tiwel adəye jaraptəna wa?

3. Kwanga bunejia darimin gaa kamu Maibe majin. Majia suluyin, majia suluyin, ngai duwo yim fal shi-a kamu Maibe-a napsana duwo, Maiye, Modu lene Gumsuro gulle ku kundishiro lengin. Dayi leyi Moduye Salam! Are, Barganzəye dawartəne kundushiro iskin cə gullono. Yo wono Gumsuye. Kamu ciyi bushi goyi dega aro cuttulu kələsə ferciyə, dayi kamu səmana cidiñ duwo Mai ishin goyi gursam kurulan rəp təmji napkono. Mai shi-a Ari-a kashu. Mai-a Gumsu-a Ari-a napkada. Səmana cadiñ cadiñ cadiñ ngai duwo, Modu ye yeya Ari “kuru adə dap kura wa argəm sa gojin” A’ a argəm sa goyinba. Maiye fanji. Modu bargata! Ha abi kambiwu diyon adə? Kuru adə argəm sa goyin kona Ari ye gojin bawo wono. Ha fandon argəm sadəma bawo wa? “Mbeyi barganəmmín” cinowo kudo tammo wunowen? Modu wap ciyi argəm jakka tulur ngalli goyu na Maiybe fandonjədən ləngədin konnu buu ciyi, aya konnu konnu konnu canno seyi samma ciya konnuro leyenza gursam kurulan rəp təmgada kəmandeye dawuro cikkəno leyeno.

Jamaso kam adə ye jaraptəna wa?

To seyi yakə adəlan ndu jaraptəna wo?

\*\*\*\*\*

## **Shim Yakə**

Kam laa lezə kamu cimowo. Kamu cimowonalan kwanga shi ye shim falla, kamu ye shim falla, yanjə ye shim falla, kəsayinjə shim falla. Ciyanə zawađə jığana lezailan kəmandeye kwa shidə shim yakə cidin kollata gowono. Kəle shim yakə adə yanəm ye shim falla, kəsayinəm ye shim falla, kanunem ye shim falla. Kəle shim yakə cidin gonəmmiya shim wunduro yim wunduro damməmin?

Kuru adəbe ngawolan, nandi kam yakə jawal fallin gayona lenondo. Nandi yakəso nguduye njada. Lenondo baram suwondo. Shi kəsayinəmdə shinzə kəla cirga hazəgə. Ngawo shi kəsayinnəmbe yanəmbe səda. Ngawo shi yanəmbe ni tam, baramdən kəsayinəm nji kərəmzə ca. Nji kərəmzə yanəmro səno sa. Yanəmye nyiro njino yam. Nyi ye kərəmmən kamunəmro yimmo sa. Adəben ngawo yanəmbe shi kəsayinəmbe kollino baramro tulok cukkuruwo. Kamu degan dagada ye nyi awi baramro tulok cukkurana adə? Yanyiye yanəm baramro kolliyi. Kəle baram adəro yanəm kollləmмо nyi njəttulukinda. Nyi kolləgəmbake nandi samma kolnjake curo barambedən lenon. Abi kəle diwin ma nadəlan? Jamaso wuro amsani suwo.

\*\*\*\*\*

## **TITTIMI (Kori)**

**Tittimi wo? Kude!**

Cari njimin njidinjə degan? Kange!

Kolli jəgani? Kundulo febe!

Wu shuwaram yanyi moworiran? Shillo!

Wu təmbər yanyi faya? Kawedo!

Wu yanyiga njangəkkin yanyi wuga njagashinba? Tada borrabe!

Wu ye col koronyi ye col kasuwu colcollero lengin? Kattan!

Wu ye liwet koronyi ye liwet kasuwu liwetliwetbero lengin? Woyina!

Mai juwa Maidugu juwanyi? Nje bəri-a kalu-abe!

Ciləm karaa ciləmro riyan bawo? Bəri!

Kamu nuyiya jajenjəa leyin? Baram

Awo kəri towodəlan kənja ngəni? Shillo!

Kəri towodəlan ngalyam gənayin? Səmo Karimobe!

Gakin ye nagənginba ye? Jawa (jawal)!

Rukkin ye gəwonnəkinba ye? kaime (kamma)!

Dəwu bərtia bərbər ba? Kunguwu!

Dəwu bərtia bərbər ba? Jawal!

Burwur kələp burwur ana kələp awo curobedə dinar? Təlam!

Wu təmara cidinba gulləkənni? Mana Mai a talaabea!

Kundemaye cinjə kutkut? ci kəribe!

Wuga lengi awiro wusəmin? Cinna njimbe!

Dungokada ka karnobe? Dawu karimobe!

Kasəke jirəwuro jipcəkənna kogona are wua təndər? Ka karkaream!

Kasəke jirəwuro jipcəkənna bu buwulen fer? Kəla karkareambe!

Tittimbenyi koskodo? Təgəra ngamdu!

Duwadənni nganjina nyam? Laama!

Kəmmonyi tulnge tarnəkiya wajiya ba? Shillewu!

Wu ye rukkin ye fandəkinba ye? Shillewu!

\*\*\*\*\*

## **TITTIMI II**

### **Matabidido-a Kamuwanjə-a**

Matabidido kamunjə fal dongur wono fa fəla, fal cuyu, fal kokko wono. Fəlarō lene konnu gone are yeno gullono. Fəlaye gongin cə leyenna konnuro fadəwo. Dungurro lene konnu gone are yeno. Dungur leyenna njiro yiyyino. Cuyu-a kokko-a bollo gəwurcain gəwurcain gəwurcain ngai duwon kwanja sawurlan ishin coru. Cuyu ye ciyu fado fərangin cə kəlamben kəmət kamgadə wono. Kokko ye kasudu gongin cə curomben fak falladə. Matabidido shi kwanjadə kadənnya dayina dayinadə karəgənjə cirəndə dawu faramben təng kamgadə. Kwanga ciyi madaro leyenna. Mada səwondənna sandi yakə mada cedin, mada cedin duwo, Sandi yakəso leya kamu fal saraga. Kamu fal saragannya. Seyi yakəson kawonja falba napsana. Ciza seyi yakəso mataro leyeda. Leyannya karaalan sandi yakəso kəla kəllada. Karaan kəla kəllyə napsana, napsana, napsana. Hahag nyi kwanyi ande yakə adəso kamu adəga rayena; nyi kərma kawo fal tayende adə. Wande kamu adə kam gadeye goyini cinewu ande sammaye manew. Wundu yaye kam kəmandeye shiro kungəna cinadə isu fero adəga goyi. Ciya sandi yakəso mataro leyada. Karaan mazain, mazain, mazain

duwo, kam falle kəmandeye shiro kungəna cino leyu magara semiye kaiwo. Kuruma falle majin, majin, majin duwo kəmande kungəna cino leyu kaski bakciya awo tədin ngaa curin kaiwo. Falle majin, majin duwo kungəna siwondə leyu awo kam nuyiya ro cikin kaiwo. Sandi sammo famjain ngai duwo leya kəla fokkada. Kamanja sosorin, ha! Kwani awo gana fandəma wa? Ala barra cəkkə ngəla. Awo gana fandəke maara semibe yiwukəna, nyi nda? Awo kaski baktabe fondəke yiwuko, nyi nda? Wu kam nuyiya ro njəkkonye yiwuko. Cirga kafyaben napsano duwo kam kaski fidamaye napcu kaski bakcə bakcə bakkunnya fero caraganamadə bəlan feccina, ha! Kwani awi awo waji? Awi wakazə? Ba fero rayenadə bəlan feccina. Magara semimaye cizə seyi samma magararo capcu fiyi wu wu goyi cuwudu bəlan təlas seyiga cisawo. Fero ye dudu cadin. Shi kamro ro njəkkoma ye nda kano rukke cə, kayi bakkannya ro cikko. Dayi seyi yakə adən fero adə wunduro yiwu wunduro dammuwi?

\*\*\*\*\*

### **Fero Mayawaa**

Curo bəlaben fero fal kadambó. Fero shawa laa Mai ye lagapcina, Maləm ye lagapcina, ngudi bəla ye lagapcina, curo bəlaben fomjin, fomjin ngai duwo, tada Maibe leyu fero adə curawo . Feroye wu tada Maiye laa laa wangı. Leyi tada Maləm kura bəlabe cirawo. Wu tada Maləm adə laa laa wangı. Tada gariwu bəlaye leyi cirayi. Wu tada gariwube laa laa wangı. Yanjə-a banjə-a ye batti kəle wundu manəmin? A'a wu ngudi kanjə-a shi bəlabe fal fomjin adəma raako. A'a adə biya njeyain nyiga roro rəwunjainman bi tada Maiye gonəmin, bi tada Maləmbe gonəmin bi tada gariwube gonəmin. Bul tada bulle batti bul fororo, wunduro kəle njiyen ha! Yanyi wu awo karəgənyiyena, Maindoso, Maləmndoso, gariwundoson təmmaro ragəkkəni. A'a ande ye təmmaro ngudi batti adəro njiyenba. Yeya Modu nyi wuga kasansəmagənna. Aa nyiga kasannjəkəna. Yanyiso banyiso ye təmmaro nyi ngudi adəro yiyenba njana adə,

kèle abi dawori wo? Kèle karaaro gayiye seyi yindi karenja cap capca ledu sado. Lezai lezai duwo na laa ngadaaro keshu. Ngada adəro kashuna fero kambi noyijinni; tada kambi nozəna. Tadye fero kambi gozə nji yalan cukowu kolyu; wollə karenja godaro njiro suraam gagənalan, shedan curo, njiye ha! Nyi awo adə kam yeyi nda tayo. Tada shedansoye kam, kam əni buccain rəp ngai duwo tada təmowo, falli koyi nji anəmnin taam dagano kèle, kam shedansoye nyima bunjain adə karenəmdə gonəm njiro gagəminda kwa fero yikkomadə wanəm njin yalan dəgayin.

Jamaso wuro amsa adə siwo.

\*\*\*\*\*

## **Modu Ngani**

Modu ngani curo yanjəyen yanjəro nga wo. Curo yanjəyen yanyi wu adə sambeyen. Awo ayin njambukin tadanyi? Lenəm cinna njimben gərtəgəm, kuluwu laskəgəm, jana kowonəm, yanyi kimeram gulləmmiya tambukin. Awo gullinnadə yanjədəye cido. Tada kadambunnya, dinason njakciyə, ngayan təmnju, kolli nji gosaro leyenonya, kwanga yindi isa; salam alaikum yedannya. Shi ye amin walaikum salam wononya, nyi ndan? Ngo awo adə gone yeno, nyi ndan awo adə kane, kayin kayin duwo, leyi ngaya kagəna nyi tukkuri laa bowoda nyi tukkuri. Adəga manəmmin duwo? Aa no. Nda lene andero nji ciləm kude wono leyu kərrimi gərneyindo, nji ciləm yenna. Nji goyi calalayin calcalyində, abi calalanəm dimin njinde bi-a kurkuri-ana wungin gullono. Ngai dayi kabinjə-a kənyijə-a goyi bararo leyeno. Na Maibero leyenonya, Modu ngani cənno, aa are kəlanyi nji ba aro kəmme. Yonji nji ba aro kəmngono. Ndakkəne cənno ndakciwo. Ba Mai baranəmmin ni ye kakke nji ba aro kəmme. Kəmdaro təgero. Lene dalon cyam nganne kude. Leyu cirga daloye napcina napcinnadə. Naam cənna, abi ndu bowonjino Modu nganicənna, rawani

cambuna curo bowosayinonya. Kwan tadaadə yanəmda awanəm gulli. Nidə dalon cyammadə yanəmda awanəm gulli. Dayi ciyina leyindo.....